

摛藻堂四庫全書薈要

集部

欽定四庫全書叢書要

集部

震澤集卷二十三



詳校官候補通政司經歷臣郭祚熾

欽定四庫全書叢要卷一萬六千八百四十九集部

震澤集卷三十三

明 王鏊 撰

雜著

蠶母傳

蠶母者蜀之魚鳧人也不知其世次所自出相傳黃帝時有神自天降女身馬首人以其狀蠶蠶然也號曰蠶母母為人柔婉有婦道以其醜也嫁久不售母雖婦人

而有經綸之志嘗曰使吾得志可大庇天下寒士俱懼
顏也自比筦葛時人莫之許會黃帝時西陵氏位長秋
後宮之屬未備母以布衣進於帝曰妾願以其不才之
身充下陳執筐笥帝曰汝何有對曰妾無有也使一旦
得備箕箒顧願捐吾軀割吾腸以報方今黑帝起北方
為嚴刑以肅殺天下陛下用妾經營之可不戰而退三
年之後變隆冬為陽和如妾之愚且欲為陛下定禮樂
上衣下裳山龍華蟲宗彝藻采以黼黻皇猷使天下覩

文明之治可乎帝大悅遂以屬后曰是所謂王臣蹇蹇
非躬之故者也母有巧思而拙於自防后寵日甚而後
宮皆妬之曰是所謂蛾眉不肯讓人者耶母日侍后三
俯三起帝憫其勞也封為長桑君母嘗請於后曰妾侍
巾櫛食恩多矣後當吐而還之居無何其種滋殖后視
之如已出親為之浴上賜洗兒錢既而卜三宮世婦之
吉者飼之密室既成厥家世婦以見於后肌肉玉雪衣
裳縞然后竦然改視為副禕禮之既而有譖之者曰母

小人也避涼附炎且其性殘虐掠物多矣后怒請帝加炮烙之刑帝曰吾聞惡不善如探湯請以試之母怡然受之不變徐曰吾固願剗吾腸以報雖就鼎鑊其甘如飴后愈怒於是聚其族抽其筋以頒賜天下既而悔曰不可使母無嗣乃留其子子遂飛去自相夫婦其類益蕃至周文王時求其子得之蜀封以五畝之宅使食邑焉至以其功配后稷曰此二人者不可一日無者也其後歷代帝王莫不崇尚而后與夫人嘗禮之以為天下

先及尹鐸為晉陽欲遵以為治簡子不可乃止其後秦用之卒滅六國

太史公曰自古人臣立功者多矣未有婦人立功作為文章制度以衣被天下如母者也可謂偉矣然母始以功見寵後卒蒙戮古稱多才為累功高不賞諒哉

短解

有國於海之西者曰龍伯東曰竫人二國相去蓋日所出沒也竫人者間竝海而西數月倏然遇龍伯焉足如

植木體如峙山企足望之不見其巔攘礪仍之不及其
脰於是龍伯睂然顧曰汝何為者崢人進曰我東海之
大人也龍伯曰吾首抵乎不周足跨乎西海摩子放踵
曾不滿搵措之眉睫不為有無吞之胸臆曾不帶芥而
何以為大崢人冁然笑曰請與子度長絜大可乎龍伯
曰吾指揮則千里辟易叱咤則四海震盪立乎廟廊國
威為強堅乎邊陲敵膽為驚崢人曰爾大止是乎汝獸
未睹於大乎今夫天仰而望之穹穹窿窿不知其終芻

而視之泯泯汶汶不見其盡盡天之覆不知凡幾海以
有此海盡海之大不知凡幾國以有爾國盡爾國之衆
不知凡幾人以有爾身較爾身之處乎兩間譬如蟻蟻
翔於四野夸我以長幾其餘者今夫大化鴻濛旁流轉
載湯穆而凝蜿蟺而代倏然而生孰歎孰泰泰山毫芒
九州一芥鯤運於海蟻休於垤龍徂乎方蝸潛於殼各
適其適孰餘不足且吾不得已而寓於形形不得已而
寓於世假耳以聞假目以視假足以行假心以思益尺

而足何羨于餘且汝未覩大之害也半畝之廬吾居而
餘而子無以容其軀一尺之練吾衣而羨而子無以蓋
其骨升斗之粟吾飽而食而子無以滿其腹且若以爾
形足以鎮國而威敵乎聚一丘之土樹數丈之木被之
以文繡繪之以眉目趨走其旁且震以肅而誰歟身橫
九畝戮於會稽腰大十圍昆陽死綏眉見於軾叔孫是
獲且爾未知也若有長吾亦有長龍伯曰汝獸何長哉
曰吾之長異於子吾之長攝之毫釐不見其圭放之宇

宙不見其大可進可退可弛可張以理天文星宿為光
以平地理海波不揚為齊相國為韓司徒為晉主簿為
魏中書且爾未知也君處西海吾處東海各形其形各
美其美使若而入我國乎必驚以為魑魅魍魎羣吠不
祥而予以自張無長惡短無短惡長予居予國孰知其
長我處我國孰知其短自我視予則子為長自長視子
則子為短自子視我則我為短自我視我則我為長兩
全其天孰知其然吾明告予人之寓於形猶水之寓於

冰條融而解何有於冰形之寓於世猶月之寓於水歟
墮而晦何有於水是故壽如聃彭聖如羲黃雄如秦項
智如陳張同歸乎黃壤是時也予試較之孰促孰延孰
媸孰妍至人乎乘天地之輿駕陰陽之馬息無何之鄉
遊無極之野僊僊乎超無有而上征吾竊慕之方將駕
鴻濛超六合後天不老視世之萬有如蜂蟻蚊蚋瞽然
過目而予乃以夸我乎於是龍伯窅然若遺其身沮然
若忘其矜曰吾過矣吾過矣吾且北面而師子

雞鳴夜解

王子夜讀有雞正鳴於庭家人犇告曰必殺之是不祥
王子曰雞其無知乎彼鳴自鳴吾何為驚彼止自止吾
何為喜雞其有知乎彼以告我是為忠告不以告我是
為容默又可殺乎且彼為不祥者誰乎雞乎抑別有物
乎雞也彼區區者是何能為別有物乎則雞可殺而彼
物者可得殺乎夫鳴雞職也特非其時耳非其時而鳴
不免於死非其時而言得免於罪乎雖然寧鳴而死不

默而生爾當與靈烏而竝名

人心道心論

或曰舜命禹曰人心惟危道心惟微人之心果有二乎
曰心者神明之舍湛然虛而已矣瑩然明而已矣虛明
之外無物也安得有二哉然則舜之言云何說者謂原
於性命之正為道心生於形氣之私為人心二者雜於
方寸之間而所以為知覺者不同則心果有二矣曰非
也心者主于一而應于萬者也譬之懸鏡於此惟物所

照照之以妍則妍應以媸則媸應謂鏡有二可乎心本虛也本明也而為形氣所蔽感之以欲則危而易縱感之以理則微而易泯心一也而有危微之異則所感者異也夫豈有二乎哉曷不反觀之吾心嗔時則無喜喜時則無嗔將謂嗔喜為二可乎哀時則無樂樂時則無哀又謂哀樂為四可乎然則所謂惟精惟一者何也曰此隨其心之發而言耳隨其心之所發而審之理耶則存之人耶則去之是所謂精也存之之久守而勿失是

所謂一也是所謂中也是堯舜相傳之本旨也

相論

近世有為宋人之言者曰南人不可為相有諸曰有之
然竊以為過矣昔者舜生於東夷禹生於西羌如以其
羌且夷也將舜禹亦不可為相耶湯之立賢曰無方周
官之命三公曰唯其人三孤曰唯其人不聞曰唯其地
也春秋時楚與吳粵未能通於上國然是時楚之相有
若令尹子文孫叔敖皆能以其國霸其餘若子胥往吳

羣蟲種往越而仕晉者尤多故曰唯楚有材晉實用之於時吳亦有若季札公孫聖粵有若計然亦能以其君顯彼數君者豈嘗借才於上國耶自漢以來其名相有若蕭何曹參沛人唐有若張九齡曲江人陸贊嘉興人宋有若范仲淹范純仁范成大蘇州人歐陽脩周必大盧陵人杜衍杭州人人若此者為賢耶為不賢耶相得若人焉其亦可矣文章事業亦有可觀者矣以其南也將盡廢之耶當晉宋之季偏安江左亦安得北人而相之然晉有謝安謝玄

吳有陸遜陸抗宋有宗澤李綱文天祥之數人者可以
將可以相假而生今之世將用之乎將以其南而不用
乎夫物之產於南者多矣錦綺羅紝南金珠璣象犀孔
翠梗楠豫章餘若橘苞竹箭山之珍海之錯捆載而北
人皆悅之賞之至於人才何獨不然為北者留為南者
去可乎不可也議者又曰天下將治地氣自北而南將
亂自南而北故南人不可用也予又非之南北對立於
天下南主生北主殺故人君向明而治孔子曰南者生

育之鄉北者幽陰之地南何以為亂乎邵子之言可信
然則孔子非歎議者又曰宋用丁謂王欽若王安石卒
以亡宋是三人者皆南產也予又非之亡宋者果三人
乎果三人也舉止三人可也今夫一家之中有賢有不
肖又安得以三人而概一方自漢以來竊國之盜無若
王莽曹操司馬懿楊堅朱溫誤國之姦無若孔光盧杞
李林甫韓侂胄之數人者出於南乎北乎北也亦將以
其人而廢其地乎大抵天地之間也有慚氣之盛也無

常三代以上南東未盡闢也故周之人才盛於西漢以來盛於北晉唐以後漸轉而南至宋南渡則中原文獻皆在南矣故國朝之興奮自南服一時元勲皆出濠定之間其後名臣碩輔如三楊蹇夏近世名臣出於南者不可僥數由是觀之南人亦何負於天下乎而必欲廢之耶昔六朝分裂南以北為索虜北以南為島夷今天下一家同為王臣奚不相悅如是哉亦見其不廣也然則宋祖曷為而有是言曰宋祖之言果可為萬世法乎

然嘗聞宋祖之言曰宰相須用讀書人不聞其曰須用
北人也是時南北相詆則斯言也安知非北人者偽為
之而謬傳之耶議者曰如子之言則南人皆可用乎曰
非然也惟賢與佞何地無之南賢用賢北賢用北亦在
人君者審擇之而已然則如之何而擇之曰在至公

擬臯言

王子曰言路開治之象也言路塞亂之萌也世所知也
於戲孰知其開也所以為塞乎昔者孝宗在御恭仁禮

下言者過為激切皆見優容其或甚忤不過貶斥旋召
還之養成直言之氣至今日之初言者遂紛紛爭肆詆
觸其所是非雖曰公義所在而時以私好惡雜乎其間
或暗承權奸風旨而有所舉劾朝廷從之以為公義之
所在也默之以為公義之所貶也亦孰知其出于權臣
之私哉且或一人舉之一人劾之一人譽之一人諱之
一人之身乍賢乍佞莫知適從上亦以初即大位過為
涵受言者不察以為得志大臣進退皆在其口當時識

者已憂處士橫議非治世之事矣至逆瑾一出首治言
官禍及縉紳毒流天下當時中人相指謂曰今日言官
曷為其不言乎而以為笑則夫今日之塞也非前日之
開為之乎曰然則言路不可開乎曰非也古者諫無官
以天下之公議寄之天下之人使天下之人言之此其
為盛也其後也雖設諫院然必求天下之望天下之所
共賢者斯任之如范仲淹司馬光之流其識公而明其
言切而不泛今也循次而授之授之初不知其賢也姑

以試之焉耳不次而擢之擢之未必以為賢也姑以崇之焉耳一除目至一二十人何仲淹光之多也曰百世一賢猶以為數又安得仲淹光而用之曰間世之賢固難逢也一時之賢何世無之惟在用人者之公且明耳按唐六典尚書左右丞執奏御史糾劾之不當者夫以天下之是非付之言官以言官之功過付之銓曹三年之間其言果忠歟直歟則進之崇之私歟佞歟則黜之抑之其庸庸者以常調處之蓋言官主糾劾而又有糾

之者所以防其私而制其肆也曰銓曹不職則奈何吾故曰以天下之公議付之天下之人斯其盛也

王子曰孔子沒天下不復有經矣班固死天下不復有史矣古之所謂史者皆世守之往往以身死職不負其意如齊南史晉董狐至漢班馬猶父子相繼人主所至執筆隨之其言其動皆親見而親書之故後世讀之若親覩其事如遷固載灌夫之使酒霍光之廢立儼然如在其時他如張湯之陽驚張禹之屢顧豈歎紀事而已

并其情偽得之此所謂信史也後世史官雖具員而無定職人主動靜邈不相及一時政事行罷不及預聞惟易世之後則紬前後奏疏而分曹書之且以宰臣監領奏疏之語果皆實乎分曹之人果皆才乎宰臣之意果皆公且正乎且生于數十年之後追書數十年之前其曲直是非皆茫然無聞或得之傳聞已非其實縱得其實而亦莫能照其情偽或奪於衆不得書或迫於勢不敢書或局於才識不能書故一時君相謀議勲業皆汨

沒不傳而姦險情態亦無有能發其微以為世戒而監
領者又往往以私好惡雜乎其間故曰不復有史矣夫
士之不得志於時猶恃有後世之公論也今一時之陞
黜既未必公而後世之褒貶又未必實則為善者亦何
所恃哉於戲為史如此其亦小人之幸也已其亦君子
之不幸也已

王子曰國家設科取士之法其可謂正矣密矣先之經
義以觀其窮理之學次之論表以觀其博古之學終之

策問以觀其時務之學士誠窮理也博古也識時務也尚何求哉其可謂良法矣然行之百五十年宜其得人超軼前代卒未聞有如古之豪傑者出於其間而文詞終有媿于古雖人才高下係于時然亦科目之制為之也夫科目之設天下之士羣趨而奔向之上意所向風俗隨之人才之高下士風之醇漓率由是出三代取士之法吾未暇論唐宋以來科有明經有進士明經即今經義之謂也進士則兼以詩賦當時二科並行而進士

得人為盛名臣將相皆是焉出明經雖近正而士之拙者則為之謂之學究詩賦雖近於浮豔而士之高明者多向之謂之進士詩賦雖浮豔然必博觀泛取出入經史百家蓋非詩賦之得人而博古之為益於治也至宋王安石為相黜詩賦崇經學科場以經義論策取士可謂一掃歷代之陋也然士專一經白首莫究其餘經史付之度外謂非已事其學誠專其識日陋其才日下蓋不過當時明經一科耳後安石言初意驅學究為進士

不意驅進士為學究蓋安石亦自悔之矣今科場雖兼策論而百年之間主司所重惟在經義士子所習亦惟經義以為經既通則策論可無俟乎習矣近年頗重策論而士習既成亦難猝變夫古之通經者通其義焉耳今也割裂裝綴穿鑿支離以希合主司之求窮年畢力莫有底止偶得科目棄如弁髦始欲從事于學而精力竭矣不復能有進矣人才之不如古其實由此也然則進士之科可無易乎曰科不疾易也經義取士其學正

矣其義精矣所恨者其途稍狹不能盡天下之才耳愚
欲於進士之外別立一科如前代制科之類必兼通諸
經博洽子史詞賦乃得預焉有官無官皆得應之其甲
授翰林次科次道次部屬而有官者則遞陞焉如此天
下之士皆將爭奮於學雖有官者亦翹翹然有興起之
心無復專經之陋矣或曰今士子一經且不能精如餘
經何曰制科以待非常之士耳以科目收天下之士以
制科收非常之才如此而後天下無遺才故曰科不殆

易也

國朝馬政散牧于民不以煩官三年兩駒駒又生駒駒生無窮馬孳無算此法之善者也豈知民心不一視馬肥瘠漠然不關于已食之不以其時乘之不以其法牧之不以其地而馬日以斃矣况望于駒乎及官歲課隨之以刑往往買駒以償於是乎民有粥產者矣有粥子者矣粥之不足流亡轉徙南北之民皆困矣及太僕印駒亦不以煩官則散牧之於近甸一旦有事取之為近

恐一家不能獨任使數家朋牧之此亦法之善者也然
今日牧於甲明日牧於乙又明日牧於丙牧無恒主姦
弊百出馬死甲曰非我也乙也乙曰非我也丙也馬病
則官相而免其罪於是又有故病其馬以規免而官刑日
滋則近甸之民又困矣民有養馬之苦官無得馬之利
於戲其法亦可少變已乎夫馬人畜也牧之得人則蕃
非人則耗蕃於專而耗於散者也自昔考牧者皆擇其
人而專任之如秦非子唐王毛仲張景順故有雲錦成

羣之効不然十羊九牧亦安所責成哉今陝西秦隴地
高寒而善水草馬之所生也國初牧地往往故在如分
其地而牧之擇其人而理之委之以專任之以重假之
以歲月吾見民無養馬之勞而雲錦成羣之効可坐而
致矣某嘗廷議及此而議者輒沮之卒以無成詩云秉
心塞淵驥牝三千又云思無疆思馬斯臧此固非淺中
狹見之可與共議也

職官考

曩者余嘗患古今官制紛紜漫無統紀讀溫公集其歷代沿革似可考而知也因著其說使後之人有所考證焉

三代官制見於周官簡易易知也秦漢而下何其紛紜乎蓋西漢以丞相總百官而九卿分治天下之事光武中興身親庶務事歸臺閣尚書始重而西漢公卿稍已失職矣魏武佐漢初建魏國置秘書令典尚書奏事文帝受禪改秘書為中書有令有監而亦不廢尚書然中

書親近而尚書疎外矣東晉以後天子以侍中常在左右多與議政事於是又有門下而中書權始分矣唐初始名三省中書主出命門下省主封駁尚書省主奉行其後合中書門下為一故有同中書門下三品同中書門下平章事其後又置政事堂蓋以中書出詔令門下封駁日有爭論紛紜不決故使兩省先於政事堂議定然後奏聞開元中張說改政事為中書門下自是至宋莫之能改唐末諸司使皆內臣領之樞密參預朝政始與

宰相分權矣及五代即用士人樞密使皆天子腹心之臣日議軍國大事其權重於宰相宋太祖乃以宰相主文事樞密使專掌武事謂之二府

唐初職事官有六省一臺九寺三監十六衛十率府之屬其外又有勲官散官以賞戰士散官以褒勤舊故必折馘執俘然後賜勲積資累階然後進階以其不可妄得故當時以為榮高宗東封武后預政求媚於衆始有泛階肅宗以後財力屈竭勲官不足以勸武功府庫不

足以募戰士遂併職事官通用為賞將帥出征者皆給空名告身自開府至郎將聽臨事注名有至異姓王者於是金帛重而官爵輕或以大將軍告身止易一醉五代等衰益紊三公端揆施於軍校衣紫執象被於胥吏名器之濫無此為甚宋承五代之弊不能釐正故臺省寺監衛率之官止以辨班列之崇卑制廩祿之厚薄多無職業其所謂官乃古之爵也所謂差遣乃古之官也所謂職者乃古之官也自餘功臣檢校官散官階勲爵

邑徒為煩文人不復貴所以鼓舞羣倫曰官曰差遣曰職而已又遷徙去來常無虛日

秦不師古太尉主五兵丞相總百官又置御史大夫以貳於相漢因之

通志云秦時少府遣吏四人在殿中主發書故謂之尚書尚主也漢承秦置及武帝游宴後庭始用宦者主中書以司馬遷為之遂罷尚書為中書之職成帝罷中書宦者置尚書五人四人分四曹常侍曹主公卿二千石

曹主郡國二千石民曹主吏民上書客曹主外國夷狄復又置三公曹主斷獄其一人為僕射通掌圖書章奏之事其任尤輕至後漢則為優重

光武廢丞相與御史大夫而以三司綜理庶務叔世事歸臺閣論道之官備員而已

漢凡諸郎皆掌執戟宿衛以侍衛之故通謂之侍郎東方朔官不過於侍郎位不過執戟是也後漢尚書侍郎三十六人隋初尚書有六曹二十四司凡領三十六侍

郎煬帝以尚書六曹各置侍郎一人以貳尚書改諸司
侍郎但曰郎則今郎中之職

讀宋史

於乎小人之流毒國家何其酷哉宋自建隆至慶厯人
主以恭恕為心而宰輔以寬厚稱上意海內和平國家
無事其間或有一二小人國勢尊安自若也然宋制多
沿五代亦有當更化而不更化者韓琦范仲淹為相稍
欲更之朝議紛然二公遂請行邊不果建立神宗慨然

狹小宋家制度將大有為而王安石素有矯世變俗之志君臣相得自謂千載一時凡祖宗之制一切掃去中外攻之愈急安石持之益固海內騷然棼極遂基一代之亂然其志亦欲為國建制非私也元祐初召用司馬光因民之不便於凡新法一切埽去然亦順天下之心除天下之害非私也而其黨遂分夫法無新舊唯其便人無疎戚唯其賢天下之事當以天下之心處之而宋人不然主元祐者以熙寧為小人主熙寧者以元祐為

邪黨互相攻擊有如水火紹聖間章惇蔡卞得志志存
報復取元祐之政又一切埽去以還熙寧之舊奪司馬
光呂公著贈謚凡元祐諸臣或貶或竄徧滿嶺海甚者
欲斲棺以僇其屍錮其子孫終身焉蔡京繼之謂當改
紀而覆出為惡復追奪司馬光等官元祐元符諸人貶
竄死徙略盡倡豐亨豫大之說務以侈靡蠱惑君心遂致
中原淪陷左祐二帝蒙塵五國城自昔小人之禍未有
若是其烈也高宗間關九死竊保一隅前日之禍可以

鑒矣于時諸將競奮金人奪氣中國之勢日振如岳飛者專任之中原可復而乃溺於秦檜之奸忘君父之大仇甘心事仇殺戮忠良放黜勲舊跡其所為又一章蔡也為之後者可以鑒矣寧宗因間得立侂胄何功顧德其立已而倚任之汝愚忠賢竄死遠州立偽學之名以次斥逐諸賢而其門客廝養如蘇師旦陳自強之流布列要位晚開邊釁卒之函首求成喪師辱國其所為又一秦檜也為之後者可以鑒矣史彌遠誅侂胄遂據其

位權勢赫奕廢君立君比跡伊霍知公論不與專任愴
壬以居臺諫一時君子貶斥殆盡其所為又一俛胄也
為之後者可以鑒矣而理宗方以賈后之弟奸惡似道
為相懷奸罔上稱臣敵國始解鄂圍而妄奏大捷以為
再造之功蒙古遣使幽之真州以啟兵端襄藩告急勢
若倒懸安坐不救日以去位邀君其君至涕泣以留之
稱之曰師臣而不名卒之蒙古入寇如蹈無人之境播
越海島而宋社屋矣似道罪惡又浮於諸人於乎宋自

紹聖而後中間惟孝宗隆熙之政差強人意而史浩湯思退猶且廁居其間自餘一奸殞一奸升率皆馮高肆毒濁亂國家為之君者曾不一聽其紛紛醞禍宿亂以至此極猶為國有君乎抑柳子厚所謂周之喪久矣徒建空名于其上者半且哲宗之世非無范純仁韓忠彦之賢也不用而用章蔡其意以章蔡為忠且賢也南渡之時非無李綱趙鼎張浚諸賢也不用而用奸檜其意以檜為忠且賢也其後非無真德秀魏了翁文天祥諸

賢也不用而用侂胄彌遠似道其意以侂胄彌遠似道
為忠且賢也由今觀之何如哉宋世權奸誤國覆轍相
尋以至於亡我朝不立宰相豈非以宋為鑒乎雖然非
相之罪也任相者之罪也語曰臨亂之君各賢其臣而
顛倒錯亂未有如宋之甚者余故表而出之以為世戒

教太子

人君之學與不學係天下之治亂太子之學與不學係
後日之治亂其重可知也賈誼曰天下之命懸於太子

太子之善在於早諭教慎選左右今夫庶民之家有子焉則必擇保姆以保護之擇良師傳以教道之而况神器所屬係宗社之安危生民之休戚者乎昔者成王幼在襁褓召公為太保周公為太傅太公為太師所以保其身體傳之德義道之教訓此三公之職也又置三少曰少保少傅少師與太子宴者也又選天下端正孝弟博聞有道術者以翼衛之所與居處出入者也遂去邪人不使見惡行故太子生而見正事聞正言行正道前

後左右皆正人也其身有不正者乎古之教太子者其制如此今國家東宮之官師保而下有庶子諭德洗馬校書等官亦既備矣然官以序進未必皆天下之選學之日晨而授書授畢而退日中進講講畢而退凡祁寒暑雨學皆間歇間歇之日所與宴遊者誰歟所與居處出入者誰歟不可得而知也又近世之弊患在上下不交然為太子亦且未同於君而今也則已儼然端默有言且不敢盡又况為君之日乎求上下交而德業成胡

可得也昔者三王之教世子必齒於學國人觀之曰將君我而與我齒讓何也曰有父在則禮然然而衆知父子之道矣其二曰將君我而與我齒讓何也曰有君在則禮然然而衆知君臣之義矣其三曰將君我而與我齒讓何也曰長長也然而衆知長幼之節矣此所以學為父子君臣長幼之道而與人同如此下至漢唐此意泯矣然明帝受尚書於桓榮及為天子矣執醬而饋執爵而酳唐劉洎岑文本馬周遞日往東宮談論治道李

泌與肅宗為布衣交出則聯轡寢則對榻國朝洪武初建大本堂取古今圖書充其中延四方名儒教太子親王分番夜直才俊之士克佯讀時時賜宴賦詩商確古今評論文學無虛日仁宗於潛邸臣嘗伏覩其教令長至燕勞東宮之臣如家人父子又從學詩學為表至有以暗逐明之喻則本朝之初亦未嘗如今制也英宗幼冲當時大臣無深識遠慮阿時所好務為尊君卑臣非祖宗之法本然也今雖未能如古之制亦宜稍略君臣

之儀敦師友之分使宮僚日侍左右從容講讀講讀之暇宴飲出入居處皆得周旋其間至暮乃退或有剪桐之戲隨事諫止游戲翰墨惟其所嗜宮僚有不法從三師糾正之甚者斥逐不使邪人得預其間如此所謂一人元良萬邦以貞三代所以久長者用此道也

漢宣帝時欲使外家許氏監護太子家疏廣以為太子師友必於天下英俊不宜獨親外家太子官屬已備復使舜監護視陋非所以廣太子德於天下也

貞觀中換太子接三師之儀出殿門迎太子先拜三師
答拜每門讓三師坐與三師書前名惶恐後名惶恐再
拜

宋天禧二年庶子張士遜等言臣等日詣資善堂參見
皇太子雖令升階列坐然後跪受望令皇太子坐受參
見詔不許至道元年皇太子每見賓客必先拜迎送常
降階及門

乾道七年討論東宮開講并慶賀辭謝禮儀官僚講讀

當依倣講筵稍殺其禮詹事以下至講讀官上堂並用賓禮參見依官職序坐皇太子正席講讀官迭起如儀延英講罷復位節朔不受宮僚參賀元日冬至詹事以下箋賀謝辭初以常見之禮後離位致詞復位就坐茶湯罷詹事初上參見拜皇太子答拜庶子等初上參見皇太子受拜庶子諭德及講讀雖有坐受之禮止是五禮定三師朝賀東宮儀上以東宮師傅皆勲舊大臣當待以殊禮朝賀難同庶僚乃命考定其儀曰唐制羣臣

朝賀東宮行四拜禮皇太子答後二拜三公朝賀前後俱答拜近代答拜之禮不行而三師之禮不可不重令擬凡大朝會前期設太子坐於大本堂設答拜褥位于堂中三師賓客諭德拜位於堂前至日太子常服陞座三師賓客常服入就位北向立皇太子起立南向贊四拜太子受前二拜答後二拜乃退

尊號議

今上自親藩入繼大統興獻王王妃上所生父母也未

知所以尊崇之有以問於鼈曰如之何鼈曰禮有所屈有所伸屈者承其重於大統則降其服降之者義也伸者推其愛於私親則隆其名隆之者仁也仁與義固並行而不悖也曰宋司馬光曰為人後者為之子不得顧其私親蓋恭愛之心分於彼則不得專於此而曰隆之何也曰聖人制禮必兩全而無偏廢以大統而降其私親可也以大統而遂廢其私親可乎所後親也義莫重焉所生親也恩莫重焉恭愛之心加於所後於所生也

遂能不恭乎不愛乎人子之心恐不若是恝也孟子曰
孝子之至莫大乎尊親為天子父尊之至也孟子稱舜
之大孝曰宗廟饗之舜承堯統而瞽瞍為天子父享宗
廟之祀禹承舜統而祀鯀於郊瞽鯀且然而曰不顧其
私親何也所謂不得顧其私親者乃魏明帝狠慢之私
心而可為萬世法乎曰宋英宗謹尊濮王歐陽創為尊
親之議當時譁然攻之以為邪說至于今皆非之而子
敢是之乎曰稱親非也稱伯獨為是乎按儀禮疏衰為

所生父母報不曰不於其父母報也脩謂服可降而父
母之名不可沒此言未可非也而光以為立文不得不
然苟如光言欲沒父母之名則立文曰所後父母三年
所生者疏衰亦何不可乎光之議以漢宣為昭帝後終
不加尊號於戾太子史皇孫光武自以元帝後亦不敢
加號于鉅鹿都尉南頓君不知戾太子得罪武帝故無
可爵之義若史皇孫亦稱悼皇考悼園置邑三百家光
武起自民間欲上附元帝故所生不敢同於七廟而南

顧亦稱皇考况光武所謂不父其父而禡其祖亦未可謂後世法也先儒謂稱親固非稱伯亦未安要當別立殊稱而殊稱有未易定者若曰某國大王則固已為王矣又何以為尊稱乎今王之上惟有皇妃之上惟有皇后皇之稱遂同大統不可以為法也然則稱親不可稱考不可稱皇稱后皆不可則亦何以為稱乎予嘗反覆思之事有兩難而可以兩全者考之漢書師丹傳哀帝初尊定陶共王為定陶恭皇母為恭皇太后皆引藩國

之名以冠大號漢廷未有以為非而師丹以為合於禮其後董宏建議欲立官置吏車服與太皇太后並而去定陶蕃國之名丹始爭之以為非禮然則隆其名而冠以蕃國之號此禮之得者也其獨不可行乎宋高宗傳位于秀王偁之子時侍郎汪應辰定其稱曰太子本生之親內批曰皇太子所生父朱子在當時未聞以為非也今士一命以上皆欲寢封其親顧尊為天子富有四海而於所生漠然不顧豈人情乎曰追崇之禮有矣而

子無爵父之義如之何曰亦從其尊而已矣今叅儀禮之文酌古今之宜定謚曰興獻皇興獻后而以太皇太后之旨行之則於大統無干犯之嫌所生亦極尊崇之義其亦庶乎其兩全矣

昭穆對

有問於王子曰宗廟之禮所以序昭穆父為昭子為穆三昭三穆以次而遷禮也其或兄弟相代世數參差禮之變也有不得如其常者如之何曰亦順其常而已矣

昭常為昭穆常為穆次當昭乎同為昭可也次當穆乎
同為穆可也而何參差之有曰是則猶為兄弟也曰然
然則春秋躋僖公何以譏左傳曰子雖齊聖不先父食
公羊傳曰譏其先祖而後祖則是以兄弟為父子矣穀
梁傳曰逆祀是無昭穆則是兄弟異昭穆矣胡文定公
因之謂僖公父視閔公父死予繼兄亡弟及名號不同
其世一也曰不然父子兄弟天屬也人惡得而亂之而
君臣所在乃或從而變焉兄為君弟為臣弟可以臣兄

未聞父乎兄也弟為君兄為臣兄可以臣弟未聞子乎
弟也閔公弟也僖公兄也而僖嘗臣于閔則君臣之分
定而兄弟之倫易矣大事於太廟而躋僖於閔之上是
以臣而加君故春秋書躋以譏之而非父子昭穆之謂
也故范甯曰以昭穆父祖為喻孔穎達曰閔僖不得為
父子同為穆耳今升僖先閔是位次之逆非昭穆亂也
今謂閔祖而僖父是以兄而父乎弟也以兄父弟途人
且知其不可而謂春秋為之乎且文定於此既以為真

父子矣及仲嬰齊後歸父則引何休以為亂昭穆之序
抑又何邪曰為人後者為之子既為之後則不得復言
兄弟也曰禮兄弟不相為後弟不為兄後子不為父孫
禮之正也然而或為之則亦不得已焉亦循其次兄終
弟及而已倫不易也何以知其然也曰兄弟一體無父
子之道昭與昭齒穆與穆齒天秩之次也商人多兄弟
相代陽甲至小乙兄弟相承者四世如各為一世而祧
則小乙之祀不及其父矣唐之穆宗宣宗皆憲宗之子

敬宗文宗武宗又皆穆宗之子各為一世而祧則懿宗
之祭不及高祖矣吾以是知其决不然也晉賀循之議
曰殷之盤庚不叙陽甲漢之光武不繼成帝昭穆父子
位也若兄弟滿輒毀上祖則祖位空懸世數不足何取
於三昭三穆與太祖之廟而七哉溫嶠亦曰凡言兄弟
不相入廟曾非禮文若一帝自為一世則禰有不祭是
庶人之不若也故晉唐以來兄終弟及其禮皆然宋太
祖太宗擬文武世室猶同為一世其後徽哲為一世高

欽為一世太廟九世十二室其倫皆不易也亦可見人
心之所安天倫之不可紊矣曰兄弟一世則聞命矣其
祭也猶同一室乎各自為室乎各自為室則武丁之世
當為五穆懿宗之世當為四昭其地將無以容煩擾偏
枯誠有如馬端臨所譏者曰亦同一廟而已禮兄弟共
食則雖四世三世一廟可也何必創造為此紛紛乎同
位異坐前代皆然曰同位異坐其次也如之何曰是有
君臣之先後焉而年之長幼有不得論若世之同堂異

室以西為上者其亦庶乎其可也

震澤集卷三十三

欽定四庫全書叢要卷一萬六千八百五十 集部

震澤集卷三十四

明 王鏊 撰

雜著

春王正月辯

春秋書春王正月左氏曰周正月也建子非春而以為春為胡安國之學者曰以夏時冠周正書王正者存周之正冠以春示行夏之時之義也是為改月不改時夫

改月不改時時則夏也月則周也上下不相值寒暑不
相蒙下之所系將安從從夏乎從周乎聖人書法不當
如是之悖戾也為蔡九峰之學者曰商周所謂正朔者
以是月為歲首朝會聘問頒歷授時於是始焉耳時不
改月亦無改也詩言七月流火六月徂暑周禮正月始
和呂覽月令中星皆與夏正合前乎商之建丑也其書
卽位曰元祀十有二月後乎秦之建亥也其書始建國
曰元年冬十月曷嘗改乎是說也於經史合矣其如春

秋之所書何桓八年冬十月雨雪僖十年冬大雨雪桓
十四年春正月無冰成元年二月無冰莊七年秋無麥
苗定元年冬十月隕霜殺菽則何以為異而書之左傳
僖五年正月日南至禮記孟獻子曰正月日至可以有
事於上帝七月日至可以有事於祖又將何以通之且
時月既不改矣孔子告顏淵何必曰行夏之時賈誼於
文帝時何必請改正朔乎為孔安國鄭康成之學者曰
商周之正朔非獨改月時亦改也後漢陳寵傳冬至陽

氣始萌天以為正周以為春十二月陽氣上通地以為正殷以為春十三月陽氣已至人以為正夏以為春三微成著以成三統是說也於春秋所書合矣其如諸經有不合且天時人事有不便乎曰惟其不便故孔子不取不然何獨取於夏時哉是其說之不一儒者苦之以為千古不決之論愚嘗反覆求之而得其說夫商周有天下改正朔易服色殊徽號以新天下之耳目也安有不改月可改時獨不可改乎夫春夏秋冬之名安始哉

亦聖人始名之建子之月一陽所始獨不可為春乎午
未之月陰氣所始獨不可為秋乎冬夏亦然商周既以
是新天下之耳目而天下習於夏正已久且天時人事
為順故行之官府則從時王之制民間所行猶多從夏
春秋所書朝廷之正也諸經所載或因民間之舊乎周
書云亦越我周王致伐于商改正異械以垂三統至於
敬授民時巡狩祭享猶自夏焉且周禮有正月又有正
歲周時二正實兼行之矣何獨民間哉曰是義也曷從

受之曰受之孔子春王正月孔子之所書行夏之時孔子所以告顏子也

獲麟說

春秋何以終於獲麟杜預之言曰感麟而作固以為終也予以為不然孟子曰王者之迹熄而詩亡詩亡然後春秋作又曰世衰道微孔子懼作春秋孔子傷當世之亂為萬世法戒而作春秋也豈獨為一麟哉假而麟不至春秋將不作耶鄭衆賈逵服虔謂孔子自衛反魯修

經已成麟感而至胡安國亦曰蕭韶作而鳳凰儀春秋
成而麒麟至余又以為不然孔子嘗曰鳳鳥不至河不出圖吾已矣夫傷不得致此瑞也孔子刪詩定書繫易
正禮樂功亦至矣不聞有所謂瑞獨春秋成而麟至乎
假而麟不至春秋將何所終耶且既為瑞矣又見獲于
鉏商何哉然則春秋曷以為是終吾以為紀異也春秋
書災不書瑞麟者聖王之瑞也時至春秋亂臣賊子接
跡于天下日食星殞地震山崩水旱霜雹六鶴退飛鴟

鵠來巢多麇有蟻史不絕書斯時也麟曷為至哉不當至而至焉茲瑞也所以為異也有年大有年祥也非所有而有焉則為異麟祥也非所至而至焉則為異楚狂之歌曰鳳兮鳳兮何德之衰茲其麟之衰乎雖然麟為聖人出也為己出而傷焉孔子其有感乎吾道其終不行乎所謂吾已矣夫者故以是終焉

河源辯

客有問河源者王子曰是非予所及履也雖然予以為

必出於崑崙曰子何以知之曰予以理知之山與水同
原天下之山起於崑崙天下之水出於崑崙無疑也曰
子不聞乎昔元世祖欲窮河源遣使行四五千里至吐
番朮甘思西部有曰鄂端淖爾者華言星宿海也有水
百泓望之如列星此河源也踰崑崙二十餘日矣予曰
西域之跡發自張騫騫所歷諸國甚久且遠東漢之世
大秦條支安息至於海濱四萬里外重譯貢獻班超遣
掾甘英窮臨西海而還皆未覩所謂崑崙也何元使得

之易乎禹本紀言河出崑崙去嵩高五萬里外國圖云
從大晉西七萬里得崑崙之墟今元使行不及五千里
云已踰之何崑崙之近乎自昔言崑崙者皆在西北元
使所圖乃在西南何也然則元使所謂崑崙者果崑崙
乎所謂星宿海者果河源乎未可知也爾雅云河出崑
崙虛色白并千七百川色黃山海經云崑崙之丘河水
出焉東南流注于汜天之水洋洋水出焉西南流注于醜
塗之水黑水出焉西流注于大杆淮南子云崑崙之墟

河水出其東北陬赤水出其東南陬洋水出其西北陬
雪山高五百由旬山頂有阿耨達池池東有恒伽河從
象口出共五百河流入東海南有新穎河從牛口出共
五百河流入南海西有博叉河從馬口出共五百河流入
西海北有斯陀河從師子口出共五百河流入北海康
泰扶南傳曰恒水之源出崑崙有五大源分流為諸水
洛書曰河自崑崙出於重野逕積石為中國之河張騫
云于寘之西水皆西流注西海其東水東流注鹽澤鹽

澤潛行地下其南則河源出焉古書所紀先後一轍宣
皆不可信而元使獨可信乎曰為其得之親見也曰古
之至人夫獨非親見鑿空以欺後世乎釋氏生於天竺
穆王宴于瑤池夫豈非親見乎而疑之也然則元使其
誣乎曰吾嘗考之河有兩源一出于寘一出崑崙之墟
且漢使亦嘗窮河源矣謂出于寘其山多玉石采來天
子案古圖書名其山為崑崙然非古所謂崑崙也元使
所見其殆是乎若崑崙之墟彼固未之覩也且天竺諸

國有身熱頭痛之坂縣度之阨熱風夏雪毒龍惡鬼猛虎獅子之害元使亦嘗歷此乎禹本紀言河出崑崙崑崙其高二千五百餘里日月所相避隱為光明也其上有醴泉瑤池淮南子載崑崙之上有木禾珠樹玉樹懸圃闔風十洲記謂弱水繞之上有金臺玉闕之類元使亦嘗覩此乎雖其神怪恍惚不可盡信而河源之出於是不可誣也近有佛圖調者謂鍾山西六百里有崑崙郭璞謂別自有小崑崙也則崑崙固非一乎曰崑崙之

遠近不一然則河源惡乎定曰水經云崑崙在西北河水出其東北陬東南流入渤海其一源出于寘之南山北流與葱嶺合東注蒲昌海郭璞云河出崑崙潛行地下至于寘國復分流岐出合而東注鹽澤復行積石為中國河此定論也予見近世之論河源者每以一夫之目廢千古之論故為之辯

性善對

秉之間於拙叟曰自昔言性者多矣至孟子而定至程

子朱子而明後世言性者不能易也予亦有異聞乎曰無以異也予思予曰天命之謂性記曰人生而靜天之性也易曰繼之者善也成之者性也是皆性善之謂也吾又何言乎曰性吾知其善也其所以善吾不知也予其有以喻之曰而欲知而之性之善乎盍反而內觀乎寂然不動之中而有至虛至靈者存焉湛兮其非有也窅兮其非無也不墮於中邊不雜於聲臭當是時也善且未形而惡有所謂惡者哉惡有所謂善惡混者哉惡

有所謂三品者哉曰性惟虛也惟靈也所謂仁義禮智者安從生曰性其猶鑑乎鑑者善應而不留物來則應物去則空鑑何有焉鑑無有而能有其有者也曰性惟虛也惟靈也則惟其善者也而惡安從生曰其生於蔽乎氣質者性之所寓也亦性之所由蔽也氣質異而性隨之譬之珠焉碌於澄淵則明碌於濁水則昏碌於污穢則穢碌於澄淵上智是也碌於濁水凡庶是也碌於污穢下愚是也故曰氣質異而性隨之曰朱子曰氣以

成形理亦賦焉天果物物而付之耶曰天地間膈塞充
滿皆氣也氣之靈則性也人得氣以生而靈隨之譬之
月在天物各隨其分而受之江湖淮海此月也池沼此
月也溝渠此月也坑塹亦此月也豈必物物而授之亦
隨其所受而不同曰所謂虛靈者果性乎是心也非性
也曰予以心性為二乎心者月之魄也性者月之光華
也情者光華之發於物者也非有異也曰予之言性也
與諸儒同而亦有不同焉者將非韓愈氏所謂雜佛老

而言之者半曰非也孔子曰心之神明是謂性

讀墨

始吾讀孟子而知楊墨之害楊氏為我是無君也墨氏兼愛是無父也無父無君是禽獸也而拒之甚嚴已而讀韓昌黎集有曰儒與墨同是堯舜同非桀紂孔子必用墨子墨子必用孔子則曰韓子排佛老者也胡進墨如是而以為疑及今得墨子讀之有所謂上賢明鬼兼愛非樂節用其詞循循然若與吾儒不異且動以大禹

為准然後知韓之取之不為無據而頗疑孟子為過既而思之古之所謂異端者非皆抗然與吾道為敵而自外於吾儒也其始蓋亦竊吾道之似以文其說特其用意過當有毫釐之差韓子蓋闇略其毫釐之失而取之取之于以見韓之大孟子辯析毫釐之際而闢之闢之于以見孟之正二者皆不為無見而孟氏嚴矣然墨子又有所謂非儒者則抗然與儒為敵而自外于正則疑非墨之本文也蓋墨之徒相里勤五侯之屬為之莊子

所謂俱誦墨經而倍譎不同者乎不然韓子安得取之
然其始不絕其流必至于汎濫墨之後有所謂佛氏者
出焉熾然駕其說謂與孔子並且將舉天下而從之所
謂涓涓不絕必為江河於乎吾于是而後知孟氏之慮
之遠也

書皮日休集後

予觀襲美與魯望倡和跌宕怪偉真所謂兩雄力相當
者及讀其集所謂文藪者亦多感慨激昂六箴有檢身

勅己之志反招逐薦有抑邪扶正之志鹿門隱書有閔時病俗之志七愛三羞有傷今懷古之志文中子碑配享昌黎請孟子為學科又幾于知道者及讀唐書則曰黃巢入關以為翰林學士朱子綱目亦書之驚曰襲美乃至是耶讀其文未嘗不悲其志壯其詞惜其遭時之不幸也守之不固也而以為恨曾不得與王維鄭虔為伍一日覽陸務觀渭南集曰襲美貌遜吳越死焉有子光業為吳越相四世孫公弼在慶歷間名士也方吳越

時中原隔絕乃有妄人造謗謂襲美隳節巢賊宋景文
喜取小說入正史公弼書欲辯之于朝不及而卒尹師
曾皮子良墓志亦云曾祖日休避廣明之難徙籍會稽
及錢氏王其地遂依之官太常博士贈禮部尚書則其
事益信矣於乎襲美千載之冤至是始雪矣不獨雪襲
美之冤亦以雪吾儒之恥也曰南部新書亦載巢今日
休作識語有裹頭三屈律之語遂為所害何耶此亦傳
聞之語也然亦可見其不屈於賊矣曰後之為史則何

如曰所聞異詞所傳聞異詞信以傳信疑以傳疑此春秋之法也

答問

或問十二辰所肖何謂也曰是非吾儒之所講也雖然嘗聞之於人二十八宿分布周天以直十二辰每辰二宿子午卯酉則三而各有所象女土蝠虛日鼠危月燕子也室火猪璧水猶亥也奎木狼婁金狗戌也胃土雉卯日雞畢月鳥酉也觜火猴參水猿申也井木犴鬼金

羊未也柳土獐星日馬張月鹿午也翼火蛇軫水蚓巳
也角木蛟亢金龍辰也氐土貉房日兔心月狐卯也尾
火虎箕水豹寅也斗土獬牛金牛丑也天禽地曜分直
于天以紀十二辰而以七曜統之此十二肖之所始也
敢問納音何謂也曰天干地支互相臨遇則無專一之
統故立納音之法猶律呂旋相為宮一音之中納五音
焉十二辰納六十音猶宮商角徵羽旋相為宮而成六
十音也律呂之法同類娶妻隔八生子甲子亦然甲子

娶乙丑而生壬申壬申又娶癸丑而生庚辰庚辰又娶
辛巳而無所生者三元之義備天地之道於是乎止也
相比而異其陰陽故稱妻相異而同其納音故稱子敢
問納甲何謂也曰朱子曰是惟京房之法叅同契以之
寓行持進退之候離為日坎為月坎離日月之正體也
月離於日而有弦望自望至晦循環出沒為八干之納
甲以卦之陰陽消長為晦明陽而明陰而晦每月初三
變坤為震昏時月出庚故庚歸震初八上弦變震為

兌昏時月在丁上故丁歸兌十五變兌為乾昏時月在甲上故月益壬甲而壬甲從乾望後月生魄變乾為巽旦時月在辛上故辛歸巽二十三日下弦變巽為艮旦時月在丙上故丙歸艮二十八後變艮為坤旦時月在乙上故月沒乙癸而乙癸向坤也所謂納甲者此之謂也

謫解

王子解內閣機務屏居洞庭之野客有自燕來者儼然造焉俯而賀仰而弔曰蓋聞士之生也皆欲有為以自

見而患無其位有其位患無其具有其具患無其時大
夫致身黃閣秩躋一品位列三孤為百辟之具瞻與天
子相唯諾有其位矣射策甲科養高中秘翹翔乎詩書
之苑齊嚙乎道義之原探隱贖則入于杪芒致廣大則
窮乎灝噩有其具矣遭時承平奸璫盜政惡熟罪盈乘
射隼之勢收殲豕之功有其時矣斯時也不聞有所建
明用勤相我國家一旦括囊卷而懷之自遯荒野上負
九重之知下孤四海之望意者其有遺行乎竊為大夫

不取也王子起而謝曰唯然誠有之凡子之所以謫我者皆是也我又何辭焉雖然子之所覩者時也所昧者勢也龍驤萬斛之舟得風焉朝三江暮五湖石尤為逆咫尺不能自致白羲綠駢之得康莊也過都越國追風逐電繫之於庭跛鰲先之于將莫邪之遇佽飛也決浮雲絕地紀藏之篋笥則與寸鐵無異且夫強弱勢也難易時也為可為於可為之時易為可為於不可為之時難方天下有事也法制未立人人自便耕釣版築之賢

販縕屠狗之徒皆得以自奮故曰易及其無事也民心
一矣奸雄息矣法制定矣社稷固矣中外相安循習故
事用一賢不見其為益用一不賢不見其為損俗漸敝
而不知法漸隳而不恤外有治平之名內有不測之憂
故曰難於半上下之不交也久矣以明主在上人思效
忠使得賜清宴之間承寬和之色發憤懣抒曾臆圖安
危於堂上列是非於階前上以安社稷下以庇蒼生誰
獨無志乎而動則關格狐憑城以獻妖蛇當道而肆蟄

君之求治甚急也有障焉莫通於下臣之納忠甚切也有障焉莫達於上一齊之傳不勝衆楚之咻一日之暴不勝十日之寒一人植之十人拔之如之何其可也是故以宇文黑獺之中才輔以區區之蘇綽猶能建制立法以垂後賈誼之經制范仲淹之才略值漢宋之盛不能更化以成一代之制豈才之不如彼哉勢則然也客曰吾聞之道無常體與時委蛇知者能因時以為勢隨勢以為功因時為勢則難者易隨勢為功則弱者強子

產之相鄭也焚載書賂伯石卒以鄭安王猛之相秦也
斬樊世逐仇滕乃以秦霸小人在位吾力能去乎則乘
傾否之勢如王猛之於秦不能去乎姑示包荒之量如
子產之於鄭則亦何能為哉四凶在朝不害唐堯之治
三豎在側不廢管仲之功王子曰不然吾聞之也薰蕕
不可以同藏忠邪不容以兩立易之泰曰內君子外小
人君子在內則君子重君子重則小人道消世所以泰
也否曰內小人外君子小人在內則小人重小人重則

君子道消世所以否也安危消長内外輕重孰從生哉顧人君所以置之置之安則安置之危則危置之重則重置之輕則輕昔者申屠安坐而鄧通泥首宋璟庭立而昌宗匍匐呂端鎖閣而繼恩傍徨韓琦出檄而守忠黜貶重也權之所在也王嘉發憤不能去一佞倖楊震連疏不能去一乳媼蕭望之以師傳之舊困於石顯趙汝愚以貴戚之重阨於侂胄輕也權之所去也不識今之所謂重者安在哉在內乎在外乎在彼乎在此乎勢

所不在而責其有為猶繫驥於庭而責其千里之步繆
鷹於韁而責其九霄之翔推舟於陸而責其濟川之功
也而可乎且夫患得患失老而不止者貪夫之為也知
止知足超然去之者志士之事也易貴見幾而作詩歌
永矢弗諼故士有淵潛而避萬乘灌園而郤三公顏闔
鑿坯而遁弘景掛冠而歸韓伯休隱名於藥肆申屠蟠
滅跡於樹屋梅福潛踪於吳市管寧投老於遼東裴相
開平泉之莊白傅結香山之社此皆哲人不得已之為

也吾將竊取之以為名若夫孔光肅容於迎謁胡廣飾
志於朝章陳咸乞靈於子公楊興假譽於君房子雲浮
湛於莽賢執誼脂韋於伾文段頴事阿保以自通齊丘
樹朋黨以自固吾誠不能與數子者並故默默甘守乎
丘園

擬盜平羣盜露布

天啓昌期薄示無虞之警神資睿算旋成不戰之功氣
祲廓清華夷寧謐恭惟皇帝陛下嗣登天位獸奮乾剛

掃一時怠玩之風振累世因循之習蠢茲羣盜敢爾逆
天安祿山之反相莫逃于壽先知管叔鮮之流言尚賴
成王不惑鴟鴞成性莫懷好音犬馬怙恩忽成反噬陞
下怒形文武之赫斯恩施乾坤之曠蕩網開一面計出
六奇置赤心于腹中推洪恩于望外故旌旗所指反側
歸心金鼓纔聞元惡授首兵車旣勒徒勞六月之師干
羽載陳奚俟七旬之格遂使燕齊趙魏四郊之狐兔都
無江漢淮沂萬里之波濤咸息此皆德符玄造謀協神

人羣策畢收愚罔遺于一得神謨默運道乃出于萬全
四門還穆穆之風萬姓覩平平之政臣職居下剗目覩
膚公珍蟾卿以當轍車築鯨鯢以為京觀武歌七德遂
完保大之名壽祝萬年願進持盈之戒

重修善權寺募緣疏

靈山福地有邦之偉觀斷刻殘碑前人之遺蹟如其就
毀自合興修切見善卷一寺初自南齊國山有封禪之
碑離墨顯象獅之相柱存天篆礎紀唐年三李丞相之

所經營橋橫玉帶諸佛如來之所示現山接銅官雖靈
光歸爾而獸存顧遺像黯然而日黑鐘樓將壓佛閣半
欹俾往蹟之漸湮乃行道之所隱伏冀仁人義士扶其
顛而持其危庶幾剩水殘山圖其新而復其舊為一時
之盛事種將來之福田其諸檀越具列如左來者續焉

賀平孝豐賊文

湖之孝豐丘壑巉巖草樹叢叢爰有劇寇二姓曰湯許
者據之謂天討之莫及敢王稅之靡供多納亡命潛懷

異圖殺掠齊民燔燒官舍妖狐負城以跳踉脩蛇當道而吞噬守土莫敢誰何當寧赫斯震怒勅巡撫蘇松等處都御史張公督師討之公乃檄浙江三司長貳各簡精銳分路進討又命廣德窒其後門太湖遏其前路東西部署遠近邀遮飛鳥翕翼而莫過奔鯨觸網而先覺已乃躬率大軍直壓賊境甫陳燕樂遂奪崑崙之關大建鼓旗徑出井陘之口賊始惶駭欲戰不敵欲竄不能旋伏道傍延頸受縛崛強心在四郊之橫草都無飛走


計窮一片之降幡斯樹公乃入其境撫其人緒其垣豬
其室不遺寸簇掃盪百年之氛不戮一人大開三面之
網錢塘江上市肆不移天目山前謳歌如故朝馳露布
夕降天書某等叨聯官次幸覩膚公昔者同其憂今也
共其慶敢無詞以賀乎

震澤集卷三十四

謹案卷三十四第五回前四行鄂端淖爾舊作火

敦腦兒今改





總校官庶吉士臣張能照

校對官檢討臣王鍾健

謄錄監生臣葉

椿

欽定四庫全書叢書要

集部

震澤集卷二十六



詳校官候補通政司經歷臣郭祚熾

欽定四庫全書
舊要卷一萬六千八百五十一

集部

震澤集卷三十五

明 王鏊 撰

題跋

恭題仁廟監國令旨

仁宗皇帝監國時長至燕勞東朝之臣之令旨此其賜
贊善臣汝玉者其孫某以示臣鏊拜手稽首以觀或傳
近例皇太子于宮僚無間訊燕勞之禮蓋天子在上不

敢外交今觀仁宗在潛邸與其臣下起居燕勞煦濡諄
切如家人父子之唯諾所謂朝嬰夕側禮固然邪於戲
是獸非近例乎

又

嘗讀東里集謂汝玉於東宮專講詩法似非輔導之義
今觀仁宗德音曰政治之方曰善政之音至有如暗逐
明之喻其于聖心必大有開發者邪當時帷幄啓沃之
言可以縣想獸詩法乎哉

恭題何都御史巡撫南直隸勅

右刑部侍郎臣鑑為副都御史巡撫江南時所被勅也
間錄一通以示臣鑑臣鑑稽首再拜題其後曰今天下
財賸仰給東南故朝廷特命重臣理之夫財生於地成
於天而理之存乎人理之有法則以不足為有餘無法
則以有餘為不足其張弛贏縮豈不存其人乎若文襄
周公忱真所謂其人哉故綸音每舉以為巡撫之法昔
者江南諸郡數苦大水公私罄縣比歲豐稔相仍粒米

狼戾亦嘗究其故乎此人事非天時也當臣鑑巡撫之時江南大饑上拔荒十二策得免軍留州祿米軍儲諸費八十餘萬於是江南諸府在在充牣時朝議濬吳松白茅等河衆方持其議以費無所出也鑑乃請以免軍諸費充焉其事始濟又議治其地即役其地之人分地程功分功賸糧官賴民之力故用米至二十八萬而不為費民賴上之濟故用人至五萬而不為勞此役成而東南無水患矣則歲之豐凶率歸之天時可乎不可也

所謂以不足為有餘者非是之謂歟使得久於職則忱
之功尚可繼乎惜乎不久以憂去矣詩曰肅肅王命仲
山甫將之臣鑑有焉

邢麗文家藏洪武三年定戶口勘合帖

嘗竊伏讀皇祖實錄見其芟刈羣雄經畫海宇莫非出
自神謨臣下仰成焉耳今觀戶口勘合亦其一事百姓
蓋日用而不知也橋山之弓曲阜之履邢氏獸能存之
謹再拜而題其後

讀曾子

曾子十章今見大戴禮其言醇粹肫切不離脩身力學言行而於孝尤諄諄焉藹乎孔氏之家法也然則是皆出於曾氏之手乎未可知也夫曾子之言見於魯論見於大學見於孝經禮記今以是擬之殆亦有若之侶孔子自孝經禮記已不能無疑況下此者乎然自前世荀卿董仲舒劉向至近世朱子小學多引用其說未有異焉雖未必盡出於曾蓋亦孔門之餘裔先秦之古文也

可不重乎昔人謂論語為曾子門人公明儀樂正子春之徒為之予於是亦云

讀孔叢子

孔叢子七卷先儒以為偽書以今考之乃孔氏之裔譜焉耳前六卷論集孔子子思子上子高子順子魚之事蓋子魚為之名曰孔叢子後一卷則漢太常孔臧以迄子立子元子建子豐子和季彥之事謂之連叢皆孔氏子孫追述前人之懿故多推尊之詞其述孔子子思或

得之家傳或聞之於人不能純一所以近於偽也而亦有至言存焉若戰國秦漢之間史所不傳者頗賴有聞其言語文章自其本色夫何偽之有

讀晏子春秋

予讀左傳所載晏子事與詞稱甚偉之信所謂以其君顯而馬遷願為執鞭者乎及今讀其所著春秋則傳所載咸在蓋丘明掇取其詞為之而不及載者尤多又以歎景公之信其臣晏子之得其君亦云盛矣而不免卒

於亂何哉至其使楚問答雖甚敏給頗類於俳乃若東
方朔之流二桃裏棗抑又甚焉其稱孔子至齊不見晏
子謂其事三君得順為有三心此豈孔子之言哉頗疑
或者偽為之非晏子本文也然則尼谿之阻謂儒者滑
稽倨傲疑亦非晏子之語晏號稱知禮彼豈自外於儒
乎最後讀孔鮒詰墨有孔晏交相譽之語乃為釋然蓋
墨子實為之或者不察而竄其語于其間墨非孔崇晏
故至此不知崇之乃所以卑之也然則後之論晏子者

要以左傳為正

跋葉文莊公手書

成化初鑿以童子游學京師時文莊公為禮侍陸叅政
文量初第進士簡中所稱用光者張姓為太學生亟稱
鑿於文莊所間以所業見於禮部之廂房公獎勵備至
有將來忠肅之許蓋以鑿與王忠肅同嫌名故云成化
十一年鑿始登第則文莊已下世叅政時為兵部郎往
來相好也弘治壬子歲予校文南畿叅政子仲名在選

中未幾參政亦故今年為弘治十二年仲來會試禮部出其父所得文莊手書一卷覽之慨念今昔為之泣然敬書其後歸之

書直道編後

初鑿讀鄉先正陳公直道編至諸學士伸救公語心獨偉之而不知其主名頃入史館得竊覽本朝實錄至大學士陳循傳備載救公語與此暗合乃知學士者循也循於時尚未入閣當時君臣之間如此

題元人書

予嘗評古今詩唐以格高宋以學勝至元乃頗出入二者之間其實似宋其韻似唐而世變之高下則有不可彊者矣唯書亦然

跋真西山墨蹟

西山先生書似草草作諦觀之乃非草草者雖不全用晉人筆法而亦不出於法之外豈胷次高故落筆便自不同邪然南渡諸公如魏鶴山李心傳兄弟書亦往往

相似豈亦習尚然邪蓋蘇黃筆法至是又一變云

跋蘇子美臨懷素自叙帖

懷素自叙帖憶嘗見之吏部侍郎吳公座上天下奇蹟也今不知所在忽覩此卷爽然神明復還舊觀其為滄浪翁之作無疑或云此卷末題云舜欽親裝殆非子美作乎而予終以為子美者亦以其用筆超妙不涉畦徑縱而法勁而潤古而奇其他予所不知也

題文丞相墨蹟後

自昔士之死節者多矣唯顏平原兄弟張睢陽文丞相事至今耿然昭灼天地間而信國尤從容夫死一耳處之不同則或輕或重或難或易而人異觀焉故曰非死之難也處死為難若公可謂能處死矣間關流離出入萬死不死而卒從容就義於柴市故曰能處死也嘗讀文山集每為歔歎而不可禁吾友錢君世恒間出其與弟妹妾女相訣并六歌手蹟宛然不知涕之無從也夫信國之死自處者義焉耳而其詞一歸之天命何哉未

知人倫焉知天道此固睢陽語也識者當自知之

跋李西臺書

西臺書今存者少匏菴出示此帖清麗圓熟姿態橫生可謂深得二王筆法者而或者猶病其稍肥吾以為不然東坡云短長肥瘦各有態玉環飛燕誰敢憎

跋王霽書

昔人論荆公多澹墨疾書類忙時作今觀元澤書亦然蓋點畫轉折意到而已未嘗有法而亦不可謂之無法

也其得於家傳者邪議者又謂公書類王濛又謂類楊
凝式又謂蕭散之趣公所自得非有所本也不知元澤
亦尚進於是邪

跋羲之墨蹟

自晉迄今蓋千有餘年其間世故凡幾變滅而片紙宛
然獨完信神物有呵護者邪

跋獻之墨蹟

平生愛臨子敬書然皆石刻耳良度少卿出示此帖恍

然若值相識而風神骨骼迥異舊觀乃知子敬妙處不

可學也

二帖皆趙光祿卿良度家藏

題宋進士王伯虎授建州叅軍勅

唐宋制中書主宣署制勅中書行門下門下行尚書省其文移體式於此亦見其概仁宗嘉祐四年三月賜進士劉輝等二百三十人及第則伯虎其輝榜進士平時韓富二公為相范蜀公罷知諫院同修起居注胡文公自兩淵轉運使召修起居注並知制誥嘻其盛矣此勅

蜀公所行卽其手製無疑獨韓富署名闕焉豈偶不當直邪抑以尊故闕之邪其餘所署猶可考見贊為韓贊齊州人仕至吏部侍郎繪為楊繪綿竹人仕至天章閣待制疇為王疇仕至樞密副使見錢公輔傳

書孫可之集後

予旣刻可之集授學者人或曰君以昌黎公為作者之聖欲學者法之顧令讀可之集何也曰昌黎海也不可以徒涉涉必用巨筏焉則可之是也書有之若升高必

自下若陟遐必自邇

題古本列子

翰林庶吉士陳子雨家藏列子三冊其陰有公案存焉
曰乾道三年蓋宋公府故紙之為也上有題勘不知為
何人書予於是得三善焉行移之舊也刻畫之精也題
勘之審也視近刻之訛謬昏闕為之一慨雖然今人作
事不如古寧歟是哉

跋吳文定公與沈石田手札

聞之王秋澗云字畫亦可以觀人之壽夭文定以甲子
七月十日奄逝此札作於是月之六日相去四日耳點
畫法度具在言辭溫潤諄切與平日無異也秋澗之言
豈欺我哉昔曾子臨終所以告孟敬子者尤謹於容貌
顏色詞氣之間文定此札久要之誠恬退之節蓋略見
焉其所養可知矣公於石田最厚往來簡牘尤多而此
札則若與永訣然者故尤重之寶之裝潢成卷俾予書
其後於戲公之筆於是乎絕矣

跋充道所藏朱文公書

觀晦翁書筆勢迅疾曾無意於求工也而尋其點畫波
磔無一不合書家矩矱豈亦所謂動容周旋中禮者邪

又

公書自言初學魏武其信然邪觀此帖豈老聃所嘗傳
見也

題夏仲昭墨竹

畫家以竹為難凡山水樓臺禽魚花木皆可以像求而

竹以意得所謂意者為其超然有出塵之思挺然有昂霄之氣蒼然有傲歲寒之節故君子貴之貴之故高人逸士多喜作之而名家者為難難者非他得其意為難也自昔畫竹者文洋州為聖其論須有成竹於胸中熟視而後下筆如兔起鶻落少緩則失之蓋其難如此國朝以畫竹名者唯王舍人孟端夏太常仲昭蓋得洋州筆法此幅乃太常為故少保于忠愍作今中丞屠公元勲得之保愛有加間以示予予惟中丞之保愛宜徒為

耳目翫好蓋重其有超然之韻挺然之節蒼然之姿與
翫物喪志者異矣

題東湖屠氏宗譜

屠於姓最寡而今為特盛八座之中凡二人焉其一為
大家宰掌都察院事字朝宗其一為大司寇字元勲其
餘登甲科官郎署者累累有焉而皆淛人也其亦盛矣
司寇患後人莫知其受姓之源流乃自譜其所出為一
大帙予受而讀之乃知淛之為屠者其所出自不能一

雖平湖之屠亦或不能一蓋其辨之嚴如此於乎先王宗法廢民散久矣唐衰譜學復廢雖士大夫多不能自知其所出今司寇乃獸能加意於此水木之思深且長矣考受姓之源則推其所以同自解元府君而下則辨其所以異原其同則不迷於所出辨其異則不混於所施可謂善為譜也易曰君子以類族辨物屠氏之譜有焉

跋蔡九達石蛇山記

予嘗與蔡子泛舟出洞庭湖登小洞庭見石蛇浮水面
指異之且欲卽之而舟忽已過不知其勝若是也及今
乞告東歸將徧厯湖中諸山搜奇抉怪庶慰吾渴況若
石蛇者邪固所願游也今與蔡子約秋高暑微當重叩
林屋登石蛇徧覽湖西諸山幸指迷焉雖然讀是記則
石蛇之勝已在吾目中矣

題東坡竹卷

坡翁墨竹其法得之文與可與可云吾墨竹一派近在

彭城然坡每自謂不如可特作老幹磊砢數葉蕭踈而其意已足蓋其胸次不凡故落筆便有超妙處此幅新篁卷石婀娜蒼潤豈其法之變乎

跋五賢像

歐陽文忠公修楊忠襄公邦乂胡忠簡公銓周文忠公必大楊文節公萬里五賢皆廬陵人也其文章節義載在史冊此像不知作者主名舊為胡忠簡諸孫如川所藏今歸王唯顥氏唯顥出以示予予為之端拜以觀道

德之容莊毅之色穆然凜然如挹五公于一堂之上信
繪事之妙也昔文丞相信國公少過五賢祠曰歿不俎
豆其間非夫也後果以節義顯天下遂與五賢作配則
圖之作宣徒然哉茲獨曷為遺之曰此圖作于景定五
年是年十月信國始召赴行在除禮部郎官其節蓋未
顯也顧今之世有善畫者特貌信國端委赤舄以繼五
賢而六之豈不偉哉

跋宋文丞相過小青口詩

右宋文丞相信國公詩墨蹟一首其詩今見指南錄中
初公自奉使巴延軍前被留得間亡真州浮海以達行
在後屯潮陽師潰被執自廣州傳至燕獄所至有詩昔
鍾儀幽而楚操莊舄病而越吟或者猶謂之仁况公流
離顛沛有感必發于詩詩必歸于忠義讀其集未嘗不
為之流涕也於戲可不謂仁乎此蓋公被執北去將至
桃源五十里而作文君徵明出以示予予謂公之精忠
大節焯焯天地間固無庸贊歎念公時在縲絏動止當

不自由其感慨不平之氣發之詩可也而字畫精妙雖
審墨之微亦皆不苟何從容如是豈公之賢能使蒙古
待之以禮耶無亦公之所養有定力故臨難如平時不
少動于中耶然則公之大節不待柴市而後知也觀于
此詩亦可以知之矣今去公且三百年片紙遺墨人傳
寶之又况其後之人乎又况徵明之賢不實其世者乎
雖然忠義所在自當有神物護持之

跋宋著作王蘋襄勅

宋高宗建炎四年以范沖直史館重修神哲兩朝實錄
王先生蘋寔預焉方章蔡得志追貶宰臣司馬光以下
上誣及宣仁自謂傳信萬世矣高宗當戎馬間感隆祐
之言汲汲為此舉又得人如沖與先生者焉此朱墨史
所為作也而萬世之公論始定雖然後世史家不公是
非混淆不厭宣仁也又安得先生輩正之

書王德文公據後

古者遣將軍功爵賞皆決于外不從中覆觀此則宋制

猶爾耶史稱善湘為宰相史彌遠姻家奏請無阻故能
成功然當時幕下戰伐有如范葵經理有如德文則其
克有成功亦豈偶然哉唯顥為德文裔孫出其公據見
示故題其上

題魏鶴山杜範李心傳手札

了翁在理宗朝與真德秀齊名皆深於理學以直道不
為時宰所容杜李二公亦皆一時名臣則其手札為世
所重非但以其字畫之工以其賢也按理宗嘉熙二年

以李心傳為秘書少監史館修撰心傳有史才通故實弟道傳尤明河洛之學性傳位至同知樞密院事淳祐五年以杜範為右丞相兼樞密使範抗言時政無有所隱初為殿中侍御史劾奏鄭清之李鳴復其後不肅與鳴復共政卒辟位去其為人如此

跋宋理宗賜鄭清之御筆詩

王唯顥家藏

右宋理宗誕節賜鄭丞相詩吳文定公鑒定為清之詳且審矣按宋史理宗開禧元年正月癸亥每正月五日

為天基聖節紫宸殿上壽集英殿大宴又青陽闈動其
左驗之明者其為清之無疑清之預史彌遠廢立之謀
駿駿遂秉鈞軸理宗恩數無亦德其立己之功而豈為
社稷計耶然清之為相亦有可觀者端平初召用正人
時謂小元祐清之有力焉至其汲引徐清叟排根程公
許其功過亦足相當予歎病其初進之不以正耳史謂
清之墮名於再相恐不歎再相而已使理宗移待清之
之恩以待天下之賢如真德秀魏了翁崔與之輩相業

寧止是乎

跋王唯顥家藏宋世登仕郎牒

紹興三十二年六月高宗內禪此牒九月行則孝宗朝也蓋紹興已受禪之後隆興未改元之前是年詔中外直言時政得失再相張浚收召胡銓王十朋周瑤皆孝宗初政之尤善者因附書之惜前後殘缺不可考見牒者主名然亦足為王氏故物矣

題蓬軒類紀

故友刑部正郎黃君諱暉字日昇為人雋發有奇氣少
攻擊業名擅一時然未甚該洽及筮仕乃始汎觀博取
雖稗官小說街談巷議經於耳而徹於心每廣座中持
論梗梗若懸河霏屑聽者皆竦而莫測其端及得所著
蓬軒類紀凡若干卷上自國家勲德下及閭閻委巷方
技滑稽災祥神怪可喜可愕固不具焉乃知其學有自
也燕閒所紀雖若不能無猥瑣或涉怪異然皆得於耳
目之所接父老之所傳縉紳之所述非無徵也况崇正

默邪之意亦往往寓乎其間他日觀民風者采之安知國史不有取乎或曰所載多吳事正可以補郡乘之缺

題趙子昂蘭亭十三帖

近世以書名家者唯松雪翁最得二王筆法幾所謂未達一間者法二王真蹟元世上不多見觀翁得定武蘭亭喜不自制如此使見昭陵真本又當何如其書法亦當遂逼真耶蘭亭本真贗前人之鑒不遺餘力矣余復何言

何言

鮮于伯機草書千文

智永千文號得羲獻家傳心法學草書者必由是入始
不失古人矩矱因學此卷其為初學發者耶亦得永禪
師筆法者耶蔡中郎不可見矣得見虎賁氏亦可矣

跋古本九經

九經古註宋淳熙眉州李監刊林屋山人俞石澗家藏
舊物也今歸子容子容亦家林屋豈其有數耶試以今
本校之則宋儒之去取因革繁簡精麤亦皆可考而知

毋徒玩其古而已

跋黃山谷草書墨跡

山谷書太白秋浦詩筆法頗不類故常或疑非真跡此不知書故也公嘗自評元祐間書筆意癡鈍用筆多不到晚入峽見長年盪槧乃悟筆法又云紹聖甲戌在黃龍山中忽得草書三昧則晚年之筆與少時固異矣安得以故我求之其間筆陣所至猛氣軼出常度然不害其為神駿也觀其自叙因錢穆父之言而改度湔祓舊

習且云摩圍閣中固知為晚年筆矣

題顧閣中六逸圖

舊題為淵明孝先畢卓馬融阮咸閻子為辨之如左

閣中寫六人像皆取其曠逸而淵明非其倫也露卧者其劉伯倫乎所謂枕麌藉糟吹邃者其桓伊乎所謂卧吹三弄題以為孝先馬融非其時矣缺題者其嵇叔夜乎所謂目送歸鴻姿意如此惜不及與石田評之

題石勒問道圖

彼邊人者亦嘗侈然自帝天下矣乃於一老沙彌前夔

變鞠躬執弟子禮彼佛之說固能動人而佛圓澄又捷出神恠故耶吾不知當時勒所問者何道澄所告者何說使勒能執此理於吾孔孟之前必將告之以二帝三王治天下之道用夏以變夷豈彼所謂最上一乘者乎孟子云今之諸侯好臣其所教而不好臣其所受教若勒可謂好臣其所受教矣而施之澄此吾儒之所歎也

題張長史郎官廳壁記

張長史人知其草聖之神逸也孰知楷法之嚴如是東

坡云自古未有不善正書而工於草者山谷云卽官廳壁記唐人正書無能出其右者故草聖度越諸家無轍跡可尋

跋張長史草書

東坡論長史草書頽然天放略有點畫意態自足山谷論長史性雖顛逸字字入法度懷素工於瘦長史工於肥瘦勁易能肥勁難工持二公之說以勘是帖有若符契顛而法肥而勁放而意足其為長史真跡無疑况又

有君謨之私印可証乎其間多屋漏痕筆法識者當自知之

書王安道登華山圖

始余讀游洄集知安道之深於醫不知其能詩也及脩蘇州誌知其能詩不知其又工於文又工於畫也觀此圖文詞繪事皆絕人遠甚而名不甚著何哉於乎華山之勝竒矣惜吾不獲從斯人遊然得此圖時閱一過亦可神遊於其間矣

恭題巡撫南畿李司空四世誥命圖

孟子云所謂故國者非謂有喬木之謂也有世臣之謂也臣伏覩李之先在宣宗朝則臣觀自草縣教諭解官就封給事中臣蕃自給事中進秩徵仕郎在武宗朝又進通議大夫副都御史臣吉安自華陽府教授亦進通議大夫右都御史而皆及其室人三世文行為時聞人而皆位不滿德委祉儲祥歸成于今尚書臣充嗣懋膺簡命入持邦憲出分主憂德惠敷施政平盜息伏念兩

朝奎章宸翰祇承敷貢夙夜不敢怠將刻之琬琰以焜
煌于後人屬臣鑒識其後臣鑒何敢贅一詞以贊日月
之末光書有之古我先王暨乃祖乃父胥及逸勤世選
爾勞余不掩爾善敢以為先朝頌詩有之於周受命自
召祖命虎拜稽首對揚王休作召公考又以為臣充嗣
頌云某月某日臣鑒拜題

震澤集卷三十五

欽定四庫全書叢要卷一萬六千八百五十二

集部

震澤集卷三十六

明 王鏊 撰

書

與人論攝生書

有自城來者言足下遇異人得長生之術僕始而喜既而疑竊為足下不取也方士之術愚不能知而所知者古今之常道夫人有生必有死猶日有晝必有夜事之固然者

也今學者所共尊而推為聖者必曰堯舜周孔堯舜周孔今安在耶假而以聖人不為異術順受其正則安期羨門鍾呂之屬見神於前者今安在耶意其竊陰陽之氣獨得須臾無死要之久也亦必散焉日生於旦死於夜月生於朔死於晦陽生則陰死陰生則陽死而元會數盡則天地亦不免於死安有自開闢以來聖者死仙者死造化亦死而吾獨欲立於不死之地耶夫神仙之說始於誰乎自老子有谷神不死之說屈子有一氣孔神之說燕昭漢武始

崇虛尚而海上迂怪之士爭扼腕而言神仙日思脫麗
以事飛昇飛昇之說卒無驗也則變為服食之說服食
之說卒無驗也則變為金丹之說至於服金丹死者往
往而是也則又變為今說今之說以為不假金石草木
皆反於身而得之則其說益玄而其效益茫且遠矣又
有所謂房中補益則其術益下夫人之死出於衽席者
八九而術者乃欲以此斲不死乃得速死於戲吾見多
矣往予居京師見薦紳往往有談此術者未始不竊歎

人心之無厭也方其未遇日誦書史拒彼甚堅一旦名
已遂志已滿而所懼者唯死也於是方士因其懼心而
入之聽其言洋洋乎真若可以凌倒影而遐觀於是始
為其所不可為以覲得其所不可得問之則動以朱子
為解自朱子有刀圭入口白日羽翰之說故術者必以
此藉口而為吾儒者亦以此自解嗟夫自吾徒讀聖賢
書所學者儒所談者儒而不免惑此則又安得以責夫
秦皇漢武之為耶自昔事服食而敗者多矣前者敗後

者進或告以往事則曰彼不得其術也我則得之從其學者曰彼不得其師也我則得之及其後也亦無異焉昔陳希夷之告宋琪不過勉以勤修政事假如今遇希夷則所以告足下不過政事而今之人開口說仙彼而能仙曷不高飛遠引超出人世縱不能然亦當清淨自守以求其所謂鉉永者而何暇犇走權勢糊其口於四方耶仙之有無不可知即使有也亦不肯遇人而言言者決非有有者決不言也或曰彼亦未敢自謂能仙但

以延年損疾耳若是則有之然人之疾多起於風寒暑濕喜怒勞佚之際能於是謹之則疾安從生且攝生之法吾儒自有之中庸之慎獨則坐忘之法也軒書之夜氣則伏氣之法也論語之失飮不時不食則服食之法也何待於彼耶况為此者類非端士愚者且不信況明者乎庶民且不為况有位者乎今足下出宰百里語默動作人所屬視喜怒威權人所竊弄從事奇襄恐有害於德夤緣請託恐有害於政謗言流聞恐有害於名如

前所陳又恐有害於身也愚聞之方人之篤於所信雖舉天下之口以辨焉亦有以自解况如僕者乎然谷永諫成帝疏柳宗元報李睦州書韓退之之誌李于歐陽永叔之序黃庭經其文具在也試取而讀之則無待於予言矣

復王巡撫三原

古之所謂大臣者有愛君之心有致君之術有告君之體有格君之誠是四者古人所難也今乃得之頃者奸

人竊弄威福播惡東南中外有心者憂有口者議然無一人敢當其前獸諉曰時不可言也閣下奮然起排其奸章疏累數千言不詭不激聞之者生氣讀之者醉心數月之間舉人果得回九重之聽快四海之心乃知天下無不可言之時無不可為之事顧所以自處者有未至耳自非力量之弘忠憤之激而真誠之積德望之隆所以感於未言之前固未易及此也某承乏史館嘗慨古人卓絕之行不可復見豈意乃今見之近者又聞命

所司決長洲諸防六十餘處白茆諸港相繼而開所以
經國賦立民命者他日信史不止一書而已也某素辱
知愛且東南之福某與有焉故敢書以為賀

復尹太宰

鼇方幼學則幸聞名於將命者顧未嘗得望履約於門
其後見錄有司入試大廷愚不識忌諱奏其猖狂之說
當道者欲擯斥之獨公奮然不顧謂其辭雖狂其心何
舉是以卒寘之一甲雖公之為此非有私於鼇而鼇之

懷德有不能忘者區區之私欲一布之左右為日久矣
方公秉樞要進退百官天下之士爭欲望拜光塵使鑿
於是時而言則亦無以自別於衆及公被萋菲孫碩膚
而東天下爭惜之而鑿之惜尤深又以官非言路耿耿
之懷欲吐復納夫有所嫌則不言有所畏則不言是區
區懷德之私終無以自達於左右雖盛德雅度不自為
功而不腆之言亦不能裨萬分之一而終欲一言之者
亦欲公之知鑿默默二十年非若木石之無知而已也

今公優游林泉如裴晉公之在綠野堂司馬公之在獨樂園雖無心於天下而天下之心終不能釋且台候康嘉百福攸集既為天下喜又私以自賀也故敢進其說如此唯諒察之

與韓尚書

僕受性愚顛與世寡諧立朝三十餘年不妄交人人亦無肯與交其號相知者纔三四人焉耳及官銓曹獲與執事為寮引分推誠固有疑惑磨礲浸灌懼懼勤勤義

契相孚有逾同氣端居自念誠不意晚年何幸之深得
友於君子也而以為慶斷金之交情以終老豈謂一朝
變作遂至乖睽嗟乎事變倉卒衆皆愕眙世之君子各
務自全莫肯相援甚者推咎于人以自解某誠不佞憤
不自制忘身直前而力寡謀淺不能少裨萬分之一心
竊媿之蓋起事之初志同許國則禍患之至義無厭殊
而當事之人莫究本末榮辱頗殊此某所以惓惓而不
能舍雖公之心未嘗有望於僕僕之心終不能無媿于

公是心也公知之僕知之不敢以告人今幸權奸摧伏
公道昭宣而海內老成零落殆盡唯公長庚曉月耿殿
諸公豈第君子實神明之所扶持謂天無意不可也公
之完名高節旣已昭晰天下而且有光于無窮視彼所
得孰多耶則公端居默處亦或不能無念于予也是心
也某知之公知之特以告公而已今公養高林下某亦
抱拙山中思欲千里命駕而出門有礙其為悒悒胡有
窮已令子官嘉興間得相接獲承勲止深以為慰衰病

不能一詞起居而兩獲手書垂問推獎過當非所克堪
南北邈絕晤語無階唯勞引領伏冀為道自愛以副惓
惓之私不宣

復謝閣老書

春初侍王手教副以土宜而因循至今莫克裁謝媿臯
媿臯吳越相望甚邇而聚首無緣歐趙高風信有未易
企及者耶近聞颶風陡作海濱之人多被其災高居近
海雖盛德君子神明擁護其亦不能無少警動于僕御

者乎未由犇視有懷無已人便輒奉承動靜萬萬自愛
不宣

與林都憲待用書

往在京師畧見顏色旋聞抗疏言人所不敢言天怒不
測中外危之而怡然就獄不沮不撓若此奇節非獨人
所難繼謂公亦不可再試矣遂瑾伏誅又得疏文危言
正色不替於前讀之洞心駭目不覺降歎所謂男子要
為天下奇非為奇也自人望之見其奇耳自媿孱弱不

敢求知於公且謂公亦無自而知我也豈意古靈薦藁
玷名其中且恐且媿莫知所由伏念僕於執事曾無一
日之雅而心恒嚮之在銓曹在內閣何嘗一日忘焉而
輒沮於讒邪之口茲亦未敢聞于公知公曾不以此望
于我也祁奚叔向謂兩得之公之心其亦然耶僕今待
盡丘園公亦且倦游矣此心恫恫恐終無以自達近讀
西征錄既偉其節又偉其辭此尹師魯之所願同皇甫
規恥于不預者也故敢輒薦其所以舊和高韻二首因

附往讀之亦足以知其志之所存不宣

與陸冢宰書

得邸報知已正位冢宰甚盛甚盛銓曹自昔所重入國朝尤重而南士居之者頗鮮若吾蘇則自昔無之而始見于今也可不謂盛乎然斯地也居之難稱之又難以三原公之賢衆不謂善蓋望之者過厚焉耳今之時又非三原之時廉恥道喪貪濁肆行執事知其所以然乎亦上之人啓之耳居其位者可無斡旋之術乎抑奔競

默貪殘崇名節獎恬退久任使此其術也勿謂時難為
此而不為將誰為矣然又有一焉自昔北人得志每擯
乎南南人得志亦稍效尤數年來遂成南北之黨願公
勿似之前輩謂天下事當以天下之心處之吾何心焉
公必不然漫及之耳僕自伏林下於當道未嘗敢以書
先而於知舊則有不當然者况屢承問及則區區之愚
亦不得默默而已也

復邵尚書書

伏承不遺猥示高製意若欲使某為之評者愚於諸經
讀之未熟厯代史尤多遺忘恒自病其記識之弗強也
則於高議又安能窺其涯涘之淺深三復之餘但知畏
之而已敬之而已頃焉山居無所用心偶書所見亦欲
錄一通就正未敢出而亦不能終隱惟訂其訛耘其穢
是所望於知己也

吳中賦稅書與巡撫李司空

古者什一而稅使民歲不過三日故天下和平而頌聲

作後世未能遽行也然亦當稍倣其意使法較然畫一而可守今天下財賦多出吳中吳中稅法未有如今日之弊者也請備言之吳中有官田有民田官田之稅一畝有五斗六斗至七斗者其外又有加耗主者不免多收蓋幾於一石矣民田五升以上似不為重而加耗愈多又有多收之弊也田之肥瘠不甚相遠而一塙之內只尺之間或為官或為民輕重懸絕細民轉賣官田價輕民田價重貧者利價之重偽以官為民富者利糧之

輕甘受其偽而不疑久之民田多歸於豪右官田多留
於貧窮貧者不能供則散之四方以逃其稅稅無所出
則攤之里甲故貧窮多流里甲坐困去住相牽同入於
困又有奸民以熟作荒歲以為例謂之積荒板荒馬役
義冢之類悉攤之於衆此加耗之所以日重者也又官
民之田舊不過十餘則近則乃至千餘自巧歷者不能
等唯奸民積年出沒其中輕重高下在其手或以其稅
寄之宦官謂之詭寄或分散於各戶謂之飛寄有司拱

手聽其所為而不去非不欲去不能去也其弊起於則數之細碎故也田之稅既重又加以重役今之所謂均徭者大率以田為定田多為上戶上戶則重田少則輕無田又輕亦不計其資力之如何也故民惟務逐末而不務力田避重役也所謂重役者大約有三曰解戶解軍須顏料納之內府者也曰斗庫供應往來使客及有司之營辦者也曰糧長督一區之稅輸之官者也顏料之入內府亦不為多而出納之際百方艱阻以百作十

以十作一折閱之數不免出倍稱之息稱貸于京以歸
則賣產以償此民之重困者一也使客往來厨傳不絕
其久留地方者日有薪炭鮑菜膏油之供加以餽送之
資游宴之費罔不取給此民之重困者二也自前代無
所謂糧長者我太祖患有司之刻民也使推殷實有行
義之家以民管民最為良法昔之為是役者未見其患
頃者朝廷之征求既多有司之侵牟滋甚舊惟督糧而
已近又使之運於京糧長不能自行奸民代之行多有

侵牟京倉艱阻亦且百方又不免稱貸以歸不特此也
貪官又從而侵牟之公務有急則取之私家有需則取
之往來應借則取之而又有常例之輸公堂之刻火耗
之刻官之百需多取於長長又安能不多取於民及逋
租積貿官吏督責如火則拆屋伐木鬻田鬻子女竟不
免死於掠擗之下此民之重困者三也三役之重皆起
於田一家當之則一家破百家當之則百家破故貧者
皆棄其田以轉徙而富者盡賣其田以避役近年吳下

田賤而無所售荒而無人耕職此之故也夫有田則有
租有身則有庸有家則有調今田既出重租又併庸調
而歸之此民之所以輕棄其田者也古之為政者驅末
作歸之田今之為政驅農民而歸之末作使民盡歸末
作則國之賦稅將安出哉時值年豐小民猶且不給一
遇水旱則流離被道餓殍塞川甚可憫也惟朝廷軫念
民窮亦嘗蠲免荒數冀以寬之而有司不奉德音或因
之為利故有賣荒送荒之說以是荒數多歸於豪右而

小民不獲沾惠於乎民之患極矣有仁心者忍坐視而不思所以拯之而拯之實難罄日夜思惟莫知所以為計孟子有言盍亦反其本矣意者今日之弊亦當先端其本乎使官田無大半之稅內府無出納之艱有司無侵刻之擾則諸弊可一掃去而民有息肩之所然官田之稅國有定法未敢輕議昔宣宗皇帝亦嘗勅減其數因是再損削細碎之數併為一二則或四五則或如舊例十一則其亦可乎出納之艱則在明主加之意時察

之而重為之禁貪官之弊則撫巡之責而乃使之晏然
在位或幸而見黜又晏然徊載而歸曾不究其贓如此
後何所懲而不為乎於乎三者之弊及今治之猶可不
然民日以困田日以蕪國家之財賦日以益缺數十載
之後吾未知其所稅駕也

與李司空論均徭賦

鑿居鄉數年見民間甚苦均徭富者或至毀家貧者多
至賣田鬻產伐樹繼以逃亡前此未有也訪其故起於

吳縣尹鄭軾，軾良吏也。輕變舊法，貽禍至今。蓋舊法計里不計戶，姑以長吳二縣論之。二縣共一千二百五十二里，歲額共一千一百五十五役。里分役數大略相當，即有參差，自可隨宜消息。每里共當一役，雖有重費十戶共之，不為甚苦。人戶貧富，里長素諳略為重輕，人亦能堪。自軾為縣，謂里長不能無弊也。悉召人戶至縣，人面審家家着役。役少人多，則儲為公用，謂之餘剩。均徭賦之為此，亦甚均也。繼其職者不能如軾，多因之為

利人人面審恣意酷派一戶有至百餘兩者嚴刑痛筆
敢有不承其餘細役似不為重而交納之際百方艱阻
多至一倍二倍三五倍者有之民吞聲而不敢言所謂
餘剩者竟不知何在故民間爭言舊法之便舊法似踈
而民悅均其利於下也今法似密而民怨專其利於上
也以愚計之役之大者莫若解戶斗庫之類宜別為一
項推上戶有名衆所知者當之而下下戶特為優免其
餘一甲止當一役按里可定不必人人面審騷動一縣

蓋面審之際不免詢人人恐重役多方行賄詢之糧塘
則賄糧塘詢之里老則賄里老無所不詢則無所不賄
故有以富為貧以貧為富有司又從而高下其手名曰
均徭實不均之大者也曷若舊法不詢而自均乎或言
舊法善矣官府之用不足如之何曰此自為役法耳非
為財用設也賦之與役不相涉入如有公用賦罰之類
尚多有之必不得已與其豫儲均徭不若別為科派科
派多及富右不及貧下也執事體國愛民之心至矣近

效一得之恩亦不自知其可用與否而公以為必可行
復詢遠謀足利永世者於此見公之心何如也民間利
害未能悉舉而徭役實其大者願公不惑羣議斷而行
之符下州縣照里定役一年足一年之用更不許僉餘
剩若有餘剩即同贓論如此數十年之害一旦除去吳
下人人歡呼相慶不特此也田無重役民皆務本不至
輕棄其田而逃亡是本末均利矣然須刊定大榜昭示
遠近永為定例不然公去吳之後貪官污吏又將如前

之為吳人之弊吾未知所稅駕也近考蘇州誌文襄役
法一里出銀一兩其輕如此其後知府汪虎變為前例
當時尚以為重不知今日流弊至於此極也今役額頗
增若倣文襄之法雖一里十兩亦甚輕且均也執事以
為何如

復巡撫李司空

九重遣使存問丘園今昔人臣之所罕遇而執事餘光
之所及也媿荷媿荷治水功完又聞有均田之舉此吳

下無窮之利也百餘年來誰敢議及此者仰羨不已然
流俗易搖大家勢族尤多不便故多紛紛之議亦願俯
順羣情上下安之此盤庚數于民由乃在位之意也如
僕之愚亦望少為增損官民不相涉入既已得之尤願
民田仍為二則官田為三則四則輕者增之不至太多
則不怨重者得少減分數亦喜出望外矣如是定為五
六則削去奇零細碎之數易於查考吏胥無緣為奸若
山蕩歲入望仍其舊為宜稍增則民難堪矣古者弛山

澤之利施以與民況增其稅乎如數不足請查積荒板
荒塙湖之數補之蓋三者類多欺隱攤其稅於衆其損
衆利已亦已久矣此最不可容者也狂瞽之見不敢不
盡亦忠於執事之職分也旌旆何時入城與衆議之

又

僕久伏林下衰病亟隕功名之念灰冷閣下不以其愚
不肖乃以其名上塵九重聞之惴恐累日自媿虛薄中
亦何有而屢玷古靈之疏詩有之老去師丹多忘事少

年之武不如人僕誠似之終不堪當世用矣不敢謝亦
不敢忘也近不自揆輒陳吳中利害顧未知閣下察否
也及賜教督不以其言為迂且將行之為善後經久之
計尤見不自滿假察納邇言且復下詢永世遠謀僕居
山林備見民間疾苦欲陳之而無路幸值閣下有可行
之位有能行之才何惜不少竭涓埃以裨海嶽惟公其
為民建無窮之基亦且有無窮之間文襄不得專美於
前矣

復邵二泉書

伏覩清朝更化特起老成此正君子彙進之時也素守
雖不可奪而詔旨不可屢違鑿竊為公思之南畿去家
不遠而太夫人聞已勿藥茲奉以之官則高義不失而
官事亦不廢似兩得之方欲以此意奉問示疏稿讀之
詞情懇至乃不知所以為心雖然此奏未上望更思而
處之已上恐亦未得俞旨亦當勉副九重側席之意是
孝之大者也病暑忽忽作報言不盡意

與王都憲懋中書

某久伏草野無復當世之才亦無復當世之志往年得
邸報乃若以不肖之名玷古靈之稿非鑿之所宜蒙也
而執事之意則厚矣讀之茫然不知何以得察於左右
久之頗憶於同年故諭德景元座上若有半面之識而
亦不甚了了滋自愧也抑又喜焉喜其不涉於朋比之
私耳雖祁大夫之舉不期叔向之知而區區之私每深
鄉往顧修敬無階焉耳邇逆藩造亂又聞仗帥義旋以

濟王師克成膚公還任臺端亦無咫尺之牘達於左右
是果忘之邪其亦叔向不見祁大夫之意乎使過吳中
復承存問乃知高義終不遐遺於是缺焉不一報則幾
於忘之矣故自疏所以如此冀執事之察之也方今聖
明更化羣賢戮力共致太平執事際可為之時其益禪
忠赤佐成一代之盛是亦僕之所以為報也若僕之踈
拙自甘老於林下矣

復邵二泉書

虛薄謬承誤恩特遣使臣存問于家切深慙懼若無以
容又辱不遠腆儀惠及是重其慙也重其過也得與見
素唱和高篇讀之但覺興寄高妙殆難措手少間當勉
課以呈但恐郢人白雪難為和耳

與某書

某卧病丘園甘與草木同朽腐忽逢聖世特遣行人下
賚且感且媿具疏謝恩復蒙蔭一子為近侍此實曠蕩
之恩人臣之所罕遇也自非密勿之臣推恩何以至此

感德無量但自念立朝三十餘年曾無絲髮之補叨忝
恩數過多恐於公議不允故敢具疏辭免伏惟照察下
悃至幸

復邵二泉書

僕今春歸自京口即還故山久不及問訊而承孝履如
宜甚慰甚慰華生來辱手誨且以墓文見屬此意甚厚
而不敢承何也先夫人之德與節前既為之碑復綴以
蕪陋之辭不能增益盛德之光而徒起人之厭雖來諭

諱均有王仲舒故事然昌黎海也變化百出讀者不覺其複如襍線之才止此矣雖勉竭駿鈍無以復進敢固辭之而華生不諒則又語之曰僕非介然為高者山澤之人猝然有求亦嘗為之況世之名公欲昭前人之德不以屬之燕許之筆而以屬不腆豈可固辭但如前所陳是以聞命而不敢也華生終不見諒則亦無如之何矣亟俛從之而猶望於察若厚幣則終不敢聞命也亦望重察之

與林見素書

比趨召過吳事嚴程峻駐節近郊必僕一見服此高情
何能已已往在京師略見顏色自後乖隔三十餘年南
北相望欽想風節稜稜聳聳迨茲披接容貌詞氣充然
粹然所謂不言而飲人以和者邪非特風節之高而已
神交千里之外心醉一日之間所得多矣自古欲治之
主不世出老臣許國固無俟區區之贊也惟倍萬為國
自愛以副海內之心不宣

欽定四庫全書

重譯集

震澤集卷三十六

謹案卷三十五第十四頁後二行巴延舊作伯頏

今改

總校官庶吉士臣張能照
校對官檢討臣王鍾健
謄錄監生臣葉椿

財團法人佛陀教育基金會 釋淨空 敬贈

